

四庫全書

子部

欽定四庫全書

子部

古今事文類聚別集卷三十二

詳校官中書臣沈 騞

侍讀臣孫球覆勘

總校官編修臣王燕緒

校對官中書臣潘奕雋

謄錄監生臣陳太初

欽定四庫全書

古今事文類聚別集卷三十一

宋 祝穆 撰

人事部

報怨

不修舊怨  
不忘舊怨

羣書要語以怨報怨則民有所懲表記或曰以德報怨何如子曰何以報德以直報怨以德報德憲問報怨過直西漢

地圖書  
直當也

詩句希怨猶逢怒多容更忤強柳怨句寫餘恨坡德怨

聊相贖

古今事實

范雎報賈

魏相魏齊笞擊范雎，雎佯死，即卷以簀置廁中。范雎得出，遂相秦，號曰張祿。而魏不知以為范雎死矣。魏聞秦且東伐韓，魏使須賈於秦。范雎聞之，為微行，敝衣間步之邸，見須賈。須賈見之而驚曰：「范叔固無恙乎？」曰：「臣

為人庸賈須賈哀之留與坐飲食乃取其一綈袍賜之因  
問秦相張君雎曰主人翁願為君借大車駟馬於主人  
翁范雎歸取大車駟馬為須賈御之入秦相為須賈待  
門下持車良久問門下曰范叔不出何也門下曰乃吾  
相張君也須賈大驚自知見賣乃肉袒膝行因門下人  
謝罪范雎曰汝罪有三所以得無死者以綈袍戀戀有  
故人之意故釋公入言之昭王罷歸范雎大供具盡請  
諸侯使與坐堂上食飲甚設而坐須賈於堂下置莝豆

其前令兩黥徒夾而馬食之又曰范雎眦睚之怨必報

封羹頡

漢高祖怨其丘嫂之轢釜封其子為羹頡侯

假公報私

晁錯為御史大夫使吏按袁盎受吳王財物言吳楚不反抵罪及吳楚果反錯欲治盎盎恐夜見竇嬰為言吳所以反願至上前口對狀嬰入言上乃召盎盎對曰方今計獨有斬錯發使赦吳楚三國復其故地上曰吾不

愛一人以謝天下乃召錯斬東市

斬醉尉

漢李廣以將軍擊匈奴坐亡失多與故潁陰侯屏居藍田南山中射獵嘗從一騎出從人田間飲還至霸陵尉醉呵止廣廣騎曰故李將軍尉曰今將軍尚不得夜行何故也廣宿亭下居無何武帝召廣為右北平郡守廣請霸陵尉與俱至軍斬之上書謝罪上報曰報忿除害勝殘去殺朕之所圖於將軍也若廼免冠徒跣稽頰請

罪豈朕之指哉將軍其率師東轍以臨右北平盛秋

富貴快意

繆布孝文時為燕相至將軍稱曰窮困不能辱身非人也富貴不能快意非賢也於是常有德厚報之有怨必以法滅之

與諸君絕

元朔中主父偃言齊王有淫佚之行上乃拜偃為齊相至齊徧召昆弟賓客散五百金予之數曰吾始貧時昆弟

不我衣食賓客不我內門今我相齊諸君迎我或千里  
吾與諸君絕矣母復入我之門乃使人告王與姊奸事  
動王王自殺上大怒以為偃劫其主令自殺偃方貴幸  
時客以千數及族死無一人視獨孔車收葬焉上聞以  
車為長者

馬援報隗

馬援上書曰夫居前不能令人輕居後不能令人軒與  
人怨不能為人患臣所耻也願詣行在所陳滅隗囂計

外寬內忌

晉何曾位太宰性華侈都官從事劉享嘗奏曾以銅鈎  
競引車轂牛蹄角後曾辟享為掾或勸勿應享謂至公  
之體不以私憾遂應辟曾因小事加享杖罰外寬內忌  
如此

言輕召怨

許攸恃功驕慢嘗於衆坐呼曹操小字曰某甲卿非我  
不得冀州也操笑曰汝言是也然內不樂後竟殺之

漢獻

紀周顥曰今年殺賊奴取金印如斗大繫肘王導甚銜之顥為王敦所害本傳

孫秀報怨

孫秀既恨石崇不與綠珠又憾潘岳昔遇之不以禮後秀為中書令岳省内見之因喚曰孫令憶疇昔周旋否秀曰中心藏之何日忘之岳於是始知不免岳父文德為琅琊太守孫秀為小史給使岳數跋踏不以人過之後收石崇及岳石先送市亦不相知潘後至石謂潘曰安仁卿亦復爾耶潘曰可謂白

首同歸潘金谷詩云投分寄石友白首同所歸乃成其識

發摘郡事

王右軍素輕藍田述藍田晚節論譽轉重右軍尤不平藍田於會稽丁艱停山陰治喪右軍代為郡屢言出弔連日不果後詣門自通主人既哭不前而去以陵辱之於是嫌隙大構後藍田臨揚州右軍尚在郡初得消息遣一參軍詣朝廷求分會稽為越州使人受意失旨大

為時賢所笑藍田密使從事數其在郡不法以先有隙  
令自為其宜右軍遂稱疾去郡以憤慨致絕

報富吏

蔡沈瑞為餘姚令始至富吏皆鮮衣美服自別瑞怒悉  
令着芒屨粗布侍立終日足有蹉跌輒加鞭捶瑞微時  
嘗至餘姚瓦器為富吏所辱故報之

不平宿憾

張延賞與李晟有夙憾及俱入朝韓滉從容邀晟平憾

且使薦延賞於帝復拜平章事既而宴禁中帝出瑞錦  
一端以示和解因為歲子求婚延賞不許歲子曰吾武夫  
雖有舊惡盃酒足解儒者難犯外睦而內含怒今未許  
婚釁未忘也

含怒欲殺

杜甫嘗醉登嚴武牀瞪視曰嚴挺之乃有此兒武銜之  
一日欲殺甫集吏於門武將出劙鉤於簾上左右白  
其母救得止

合謀報怨

楊炎為吏部侍郎劉晏為尚書盛氣不相下晏治元載罪而逮坐貶及炎執政銜宿怒將為載執仇遂罷晏貶忠州刺史炎必欲傳其罪知庾準與要素憾乃擢為荆南節度使準即奏晏與朱泚書語言怨望又葱卒擅取官物脅詔使謀作亂炎證成之建中元年詔中人賜晏死天下以為冤

多修舊怨

李吉甫為相多修舊怨唐憲紀通鑑薛逢與劉瑑相善瑑詞

藝不逮逢每悔之後瑑作相逢為郎官有薦薛逢知制

誥者瑑以故事給舍須歷郡縣出逢為巴州刺史

小怨必報

李訓鄭注平生絲髮恩怨無不報者

恩怨皆報

桑維翰拜相故人韓魚通謁公默不語魚退曰桑公吾  
故人今見之有不可犯之色翌日告別公曰吾奏子姓

名授子學士俄有二吏持箱中有黃誥及袍笏之類公  
置酒開懷曰朱炳秀才安乎頃最相愛為吾召來一如  
魚禮他日又曰羌岵秀才何在最相鄙薄君子不念舊  
惡為吾作書召之當與一官岵至忽有吏數人執岵云  
羌岵謀反罪當處斬岵大叫曰韓魚召我來受害我何  
罪乃斬之魚乃告疾還鄉一日公坐小軒見岵來曰相  
公生殺在己岵昔日同場屋間相諧謔乃戲笑耳相公  
何報之深也吾上訴於天帝矣公曰吾為子飯僧誦佛

書可乎姑曰得君之命而已公不久果死

見幾避怨

寶儀開寶中為翰林學士時趙普專政帝患之欲聞其過一日召儀語及普所為多不法且譽儀早負才望之意儀盛言普開國勲臣公忠直亮社稷之鎮帝不悅儀歸言於諸弟張酒引滿語其故曰我必不作宰相然亦不詣朱崖吾門可保矣既而召學士盧多遜多遜嘗有憾於普又喜其進用遂攻普之短出鎮河陽普之罷甚

危賴以勲舊脫禍多遜遂參知政事作相太平興國七年普復入相多遜有崖州之行是其言之驗也

因史報怨

富鄭公與韓公議不合富恨之至不弔魏公喪富公守某州魯直為尉久不之任在路遷延富有所聞大怒及到遂不與交代後幕幹勸之方肯及魯直在史館修韓魏公傳使人問富曾弔韓喪否知其不曾遂以此事送下案中造成案底後人雖修去喪事而有案底竟不可去

魯直也可謂乖但魏公年却使人去鄭公家上壽恁  
地便是富不如韓較寬

不念舊惡以下係不報舊怨

伯夷叔齊不念舊惡怨是用希

廉蘭交驩見同列和門

竊灌楚瓜見瓜門

不報獄吏

漢韓安國為梁中大夫坐法抵罪獄吏田甲辱之安國

曰死灰獨不復然乎甲曰然即溺之居無幾漢拜安國為梁內史起徒史為二十石田甲亡安國曰甲不就官我滅而宗甲肉袒謝安國笑曰公等足與治乎卒善遇之

寇賈交驩見同列

和門

不恤私怨

趙清獻為御史力攻陳恭公范文正公范蜀公知諫院獨救之清獻遂併劾蜀公黨宰相懷其私恩蜀公復論

御史以陰事誣人是妄加人以死罪請下詔斬之以示  
天下熙寧初蜀公與時論不合求致仕或欲遂謫之清  
獻不從或曰彼不嘗欲斬公者耶清獻曰吾方論國事  
何暇恤私怨方蜀公辯恭公時世固不以為過至清獻  
之言聞者尤歎服云

不念前辱

孫文懿公眉州人少時家貧欲典田赴試京師自經縣  
判狀尉李昭言戲之云似君人物來試京師有幾文懿

以第三登第後判審官院李昭言者赴調見公恐甚意  
公不忘前日之言也公特差昭言知眉州又公嘗聚徒  
榮州得束修之物持歸為一村鎮將悉稅之至公任監  
左藏庫鎮將者部川絹綱至見公愧懼公慰藉之贈黃  
金一兩其盛德如此

不怨臺劾

文潞公以太尉留守西京唐介參政之子義問為轉運  
判官文潞公謂曰仁宗朝先參政為臺諫以言某謫官

某亦罷相判潭州未幾某復召還相位某上言唐某所  
言正中臣罪召臣未召唐某臣不敢行仁宗用某言起  
參政通判潭州尋至大用與某同執政相知為深

不忘舊怨

陳希亮字公弼剛正人也嘉祐中知鳳翔府東坡初擢  
制科簽書判官事吏呼蘇賢良公怒曰府判官何賢良  
也杖其吏不顧或謁入不得見故東坡客次假寐詩云  
雖無性命憂且復忍斯須後九日獨不預府宴登真興

寺閣詩云憶弟恨如雲不散望鄉心似雨難開其不堪如此又詩案云任鳳翔府僉判為中元節不過府廳罰銅八斤亦公弼按也坡作齋醮禱祈諸神文公弼必塗墨改定數往反至為公弼作凌虛臺記曰東則秦穆公祈年索泉南則漢武帝長楊五祚北則隋之仁壽唐之九成計一時之盛宏傑詭麗堅固而不可動者豈特百倍於臺而已哉然數世之後欲求其髣髴破瓦頽垣無復存者既已化為禾黍荆棘丘墟壠畝矣而況於此臺歟

夫臺不足恃於久長而況於人事之得喪忽往而忽來者歟或者欲以夸世而自足則過矣公弼覽之笑曰吾視蘇明允猶子也某猶孫子也平日不以辭色假之者以其年少暴得大名懼夫滿而不勝也乃不吾樂耶不易一字並命刻之石

恨不見知見不見  
門

古今文集

雜著

作詩快怨

劉禹錫柳子厚與武元衡素不叶二人之貶元衡為相時也禹錫為靖共佳人怨以悼元衡之死其實快之子厚古東門行亦然

陰報

善報  
冥數

惡報

羣書要語作善降之百祥作不善降之百殃書一年種之以穀十年樹之以木百年來之以德

古今事實

斷蛇獲報

見蛇門

活千人必封

前漢王翁孺傳活千人其子孫必封吾所活者萬餘人  
後世其興乎

于公高門

于定國父于公為縣獄吏于公所決皆不恨其閭門壞  
父老方共治之于公謂曰少高大閭門令容駟馬高蓋  
車我治獄多陰德未曾有所寃子孫必有興者至定國

為丞相

其後必興

鄧禹嘗歎曰吾將百萬之衆未嘗妄殺一人後世必有  
興者

陰德獨知

隋李士謙躬處節儉每以賑施為務仁心所感羣生  
子交共相乳或謂士謙子多陰德答曰夫言陰德其猶  
耳鳴已獨知之人無知者今吾所作吾子皆知何陰德

之有

還寶帶獲報

白中令應舉屢不第詣葫蘆生問命生殊不許後上安  
上門見一婦人以新紫帕封在闌中女奴力倦置於門  
闌車馬駢集婦人女奴相夫帕在闌旁公為守衛至日  
晏其主竟不至忽婦人號泣曰夫犯刑憲有能救護惟  
欲寶帶今辰遺失夫不免極刑矣公以帶還之其人泣  
謝而去明日再見葫蘆生曰秀才近有陰德來年及第

位極人臣

還玉帶獲報

見相門

義槩獲報

見玉門

銜珠報德

見雀門

其後必昌

鄭屯田建中其先本雍人五季時徙家安陸貲錢鉅萬  
城中居人多舍客也每大雨則載瓦以行問有屋漏則  
補之若客舍自為之屋亦為繕治又隆冬苦寒蠲舍綿

盈月屯田君晚得一子即侍郎公紓也登進士第官至  
祠曹侍郎有五子長曰彌中登第至朝奉大夫次郎侍  
讀公毅夫皇祐五年魁天下士三子與孫皆仕以官不  
繇選調世祿不絕陰施之報蓋不誣矣

殺降無後

以下傳  
惡報

李廣曰吾為隴西守羌嘗反吾誘降者八百人詐而同  
日殺之至今恨獨此耳王朔曰禍莫大於殺已降此乃  
將軍所以不得侯也本然三代之將道家所忌自廣至

陵遂亡其宗哀哉

李廣之不侯史氏以為殺已降余謂非特此而已  
其殺灞陵尉不亦甚哉廣自抵陰譴宣止不侯而  
已耶至陵身臣虜庭而李氏夷滅其報豈不顯哉

客舍之報

秦孝公卒太子立公子虔之徒告商君欲反發吏捕商  
君商君亡至闕下欲舍客舍人不知其是商君也曰商  
君之法舍人無驗者坐之商君喟然歎曰嗟夫為法之

敝一至此哉

僦屋之報

蘇子由謫雷州不許占官舍遂僦民屋章子厚又以為  
強奪民居下本州追民究治以僦券甚明乃已不一二  
年子厚謫雷州亦問舍於民民曰前蘇公來為章丞相  
幾破我家今不可也其報如此

當食萬羊

見羊門以  
下係冥數

預知死日

見死門乖  
崖遺像注

預知科名

金陵有僧嗜酒佯狂時言人禍福人謂之風和尚陳瑩中應舉時間之云我作狀元否即應之曰無時可得瑩中復謂之曰我決不可得耶又應如初明年時彥御試第一人而瑩中第二方悟其言無時可得之說

預知大魁

柳道者泉州人遇異僧授以要旨能預言未兆或戲之曰今歲狀元何姓答曰不黑不白非朱非綠復問曰亦

知其名字乃舉衣裾以示人後數日捷音至乃黃裳也

朱衣點頭

見校文門

出門應識

鄉人危叙應舉探省榜出門數步逢泥滓老嫗指示秀  
才可低處過危即從之看榜最末有名是歲果及第

洛陽牡丹

見牡丹門

成壞前定

至和二年成都人費孝先遊青城詣老人村壞其竹牀

孝先欲償其直老人笑曰子視其下書云此床某年月  
日造某年月日為費孝先所壞成壞有故子何償焉

古今文集

雜著

陰德論

李德裕

陳平稱吾多陰謀道家之所禁吾世即廢亦已矣不能  
復起以吾多陰禍也至曾孫何國絕班生著陳平之言  
以為世戒理當然矣而丙丞相纔及子顯黜為關內侯

至孫昌乃絕國絕二十二歲復續而張湯杜周子孫世有令名皆在顯位其故何哉丙丞相於漢宣之德可謂至矣晉荀息以忠貞之故不負獻公程嬰以託孤之義不忍欺趙氏所以繼之以死終不食言丙丞相於史皇孫微君臣之分無親戚之情而保養曾孫仁心惻隱置於間燥紿以私財介然拒天子之使因是全四海之命又有漢霍光決定大策既而顯徵卿之美削士伍之辭其深厚不伐古所未有夏侯勝以為有陰德者必享其

樂以及子孫是宜篤生賢人世濟其美古所謂有後者良謂是矣焉在傳爵邑而已哉張杜有後豈用法雖深而治者或能去天下之惡除生人之害所以然也

三槐堂銘

蘇子瞻

天可必乎賢者不必貴仁者不必壽天不可必乎仁者必有後二者將安取衷哉吾聞之申包胥曰人定者勝天天定亦能勝人世之論天者皆不待其定而求之故以天為茫茫善者以怠惡者以肆盜跖之壽孔顏之厄

此皆天之未定者也松栢生於山林其始也困於蓬蒿  
厄於牛羊而其終也貫四時閱千歲而不改者其天定  
也善惡之報至於子孫而其定也久矣吾以所見所聞  
所傳聞考之而其可必也審矣國之將興必有世德之  
人厚施而不食其報晉公暗指然後其子孫能與守文太平  
之主共天下之福故兵部侍郎晉國王公顯於漢周之  
際歷事太祖太宗文武忠孝天下望以為相而公卒以  
直道不容於時蓋嘗手植三槐於庭曰吾之子孫必有

為三公者已而其子魏國文正公相真宗皇帝於景德  
祥符之間朝廷清明天下無事之時享其福祿榮名者  
十有八年今夫寓物於人明日而取之有得有否而晉  
公修德於身責報於天取必於數十年之後如持左契  
交手相付吾是以知天之果可必也吾不及見魏公而  
見其子懿敏公以直諫事仁宗皇帝出入侍從將帥三  
十餘年位不滿其德天將復興王氏也歟何其子孫之  
多賢也世有以晉公比李栖筠者其雄才直氣真不相

上下而栖筠之子吉甫其孫德裕功名富貴略與王氏等而忠恕仁厚不及魏公父子由此觀之王氏之福蓋未艾也懿敏公之子輩與吾遊好德而文以世其家吾是以錄之銘曰

嗚呼休哉 魏公之業 與槐俱萌 封植之勤  
必世乃成 既相真宗 四方砥平 歸視其家  
槐陰滿庭 吾儕小人 朝不及夕 相時射利  
遑恤厥德 庶幾僥倖 不種而獲 不有君子

其何能國 王城之東 晉公所廬 鬱鬱三槐

惟德之符 嘴呼休哉

張佛子傳

王拱辰

予少之時聞都下有張佛子者惜其未之見也又慮好事者之偏辭也逮予之職御史得門下給事張亨者始未之奇明年於直舍迺聞其徒相與語始知亨乃張佛子之子予因詰其詳於亨亨遂書其本末聞而驚且歎曰是其後必昌乎輒以亨之言紀其實以垂鑒將來張

佛子名慶京師人也以淳化元年生生三歲而父母俱亡亦無伯仲兄弟遂養於外戚趙氏洎長因襲姓趙氏亦未知自明趙氏之鄰有郭榮者世為右軍巡院吏趙氏因以慶屬焉郭氏告老慶遂補郭氏之闕寶祥符三年也慶之司獄常以矜慎自持好潔獄應囚具必親沐至暑月尤數每戒其徒曰人之麗於法豈得已哉我輩以司獄為職若不知恤則罪者何所赴憇耶飲食湯藥卧具必加精潔常為其徒侮之曰若區區為此乃欲要

福乎慶亦莫之顧也好看法華經每有重囚就戮則為  
之齋素誦佛一月乃止囚有無辜者輒私釋之放其去  
乃祝之曰若無辜我願以身贖若也坐罪後遇恩赦旋  
亦自免其囚獄有訖鞫者慶以至誠疏畫條令美言以  
喻之故不訊考而疑獄常決獄官往往屬意焉其妻袁  
氏年四十八景祐五年京師疫袁氏染疾而斃已三日  
矣尚未殮也忽然而坐不語衆覩以為更生踰時遍體  
流汗遂甦因告其家屬曰我始行一所穢汚所聚不覺

身之在其間乃啓念欲得一清涼處忽見一白衣端嚴修長謂袁氏曰汝不當在此何為而來急去急去汝夫陰功甚多子孫當有興者汝今尚未有嗣胡為來此言未終白衣人乃以手提袁氏之足拋出穢污遂乃復甦袁氏自念常事白衣觀音精虔必有感應自是里巷人相與言曰信乎趙佛子迺獲陰報也其後族人因告慶曰爾本張姓也乃述其始末因歸其姓張焉慶年八十二一夕無病而卒袁氏更生之明年生子乃亨亨生三

日有一道士者丐於慶之門慶因延入不復詢其誰何既坐謂慶曰若本無嗣今乃聞嬰兒聲非若子乎慶曰今四十九歲止有二女三日前偶得一子道者曰信乎陰功未易量也爾必積累善事非一朝一夕聽嬰兒聲不獨爾之有嗣又喜子孫有文學者相繼而出也爾善保之飯訖乃去慶止生是男既長記名於門下後省予以亨乃得其實於是知慶之後必大皇祐六年以宣徽出守太原因用門下給使恩例乃以亨之年勞丐諸朝

廷補授亨以三班借職今亨乃生六子戒之曰當令讀書無怠乃誠旋顧爾考之餘澤當有所授矣至和元年

六月太原王拱辰撰

書張佛子傳後

虞策

元初末年予罷給事中蒙恩除龍圖閣待制出守青社有張洪者因予校閱後圃出宣徽所撰佛子文予因詰洪曰張佛子非爾族乎洪曰乃祖父也曰爾考非亨乎洪曰然元祐二年以左藏庫副使終於家所謂六子者

爾預之乎曰洪其長也又詰其季曰鍔曰鑄曰鐸三弟  
也於元豐五年同登黃裳榜曰鑄曰銑並預薦開封然  
後信宣徽王公為知人崇寧元年予自高陽詣闕明年  
試戶部侍郎辟洪為檢討文字官是歲洪之子公裕公  
庠亦同登霍端友榜京師士大夫無不相傳為盛事信  
乎天之祐善人也如影響之速今洪又出宣徽所撰文  
求予為後傳因勉從其善應之實以成前事之美云張  
佛子今贈左司禦率府帥袁氏贈原德太君乃亨之贈

也崇寧二年錢塘虞策書

論商鞅客舍之報

少穎

孟子曰戒之戒之出乎爾者反乎爾者也自古用嚴刑以毒民者未有不反於己然亦未有如鞅之速也鞅之出亡至闢下欲舍客舍人不知其商君也曰商君之法令舍人無驗者坐之商君歎曰嗚呼為法之弊一至此哉商君以舍人無驗者困秦民卒以自困非特是也始也刑太子之傅公子虔終也公子虔告商君欲反始也

與公子卬會盟而終也伏甲以襲之及其終也出奔亡  
魏魏人以襲公子卬之故扼而不納反送以歸秦遂遭  
車裂之禍即是以觀孟子之所謂出乎爾者反乎爾豈  
不信哉

論三世為將

胡明仲

或謂李陵乃廣孫三世為將道家所忌也曾不知呂望  
秉旄仗鉞其子繼掌虎賁開封營丘傳數十世太公兵  
法至於今用之是何歟

論張湯宜無後

胡明仲

世疑張湯文深意忌用法嚴酷不當有後而其子孫蕃衍盛大則又為之說曰達賢者有後張湯是也湯宜無後者也愚謂不然人之為善與惡天未必遂遂然而禍福之也堯之子丹朱為何惡而致之瞽之子舜為何善而來之然堯舜之後不絕者數百年蓋堯之德盛非朱所能逃黃帝之德遠非瞽所能過也上無以報引乎其前下無以承翼乎其後苟有寸功薄善遽已責報於天

曰吾宜壽宜貴宜有子孫也至於憎疾小人見其罪惡  
又以為天必譴怒曰是宜夭宜貧宜無餘類也小遼緩  
不應則指天為高遠茫乎善惡之報是皆以偏心淺智  
妄量天道而不知善祥惡殃必以類至理存感應如寒  
暑雨暘之消息不可誣也故人亦自修而已矣不必為  
明有賞幽有福然後為善不必為明有罰幽有禍然後  
不為惡斯人也其天之所祐歟何也天者公也非有所  
親疎而取舍之者也必為明有賞幽有福然後不為惡

斯人也其天之所不祚歟何也天者理也非有所利害而去就之也

柳勝傳

柳勝字平之卽金鄉升平里人也濫得一官藉以武斷鄉曲性鴉毒而鼠貪苟可攫財雖親族比鄰亦反眼不相顧其所居鄉素產書籍流布天下無問宦族儒家皆畜書板以資生理鄉有兩市相距僅一舍隔往來貿易惟人之便其印書傭工則有私約非納錢於衆不許輒

以傭售此乃小民欲擅衣食之源其習俗亦從古然矣  
勝視書市可為龍斷以其利不惮身為市駢攘取鬻  
書之權一聽於己則下令曰此市之書不許鬻於彼市  
違者罰錢若干其印書傭工不許以私約限違者亦罰  
錢若干行之未久適有征商其官殷述慶字去貧瑞芝  
鄉鄉雲里人也貪酷之聲素著刻剥鄉鄰正與勝等始  
至交篆勝往謁之一見首告以取財之法述慶大喜自  
此同惡相濟互為表裏勝挾私以行科罰述慶假公以

施敲朴鄉人嚴憚而心不以為便仍以書籍越境售之  
勝乃嗾鄉之惡少巡邏搜捕如犯私釁遭罰者不知其  
幾傭工則各使納價於官而不理私約以此得錢甚豐  
每遇休澣勝與述慶設燕對飲綜計所得鴻溝以分雖  
書板之家惡其貪鄙不欲與競而諸傭工不堪其害怨  
讟之聲籍籍於道於是羣聚爇香而訴於廟之神通畫  
夜禮阿育王塔以詛以呪者餘二百人未半載勝果以  
暴死死之日七竅流血如注不數日述慶亦以惡疾殂

會無與主喪者吏遣人馳訃報其家比其反則尸蟲出  
戶臭溢街巷過者掩鼻於時衆傭工相與鼓樂歌舞於  
市以幸二貪之死雖古之燃臍襪口有不足以喻其快  
也然尤有一異事勝家有老僕病忽與一黑犬同日而  
死越一宿僕大皆復甦僕良久蹶然起坐徧體汗流且  
告人曰吾適登一所若世之官府兵衛森列有王者戴  
平天冠衣猩紅袍廟坐殿上吏卒傳呼甚嚴階下有數  
夜叉鬼押二罪人至皆囚首械繫每囚各有惡蛇六纏

繞其身而嚙之髡能認其一乃吾主人翁其一即征官也吾見之不覺戰懼須臾引問二囚皆若隱諱不實者後令繩拷撻痛楚之聲至不忍聞又敕左右取呪詛者書來示二囚又取帖子一沓則是記吾為主人翁領錢數而黑犬則常隨吾往領錢以歸者以此為証二囚乃伏辯殿上若有呼者云柳勝殷述慶再押入地獄不以赦原永不在輪迴之數恍惚間夜叉鬼推吾及犬皆墮河水中及開目則此身乃在卧榻上而黑犬亦鳴

嗚然若有所訴者是後書市復通融貿易如舊而傭工私約亦竟不可破云

壽樟先生贊曰始吾讀書至殷人厥口詛咒持以為怨詈之辭讀春秋至會盟之事特以為要約之信耳殆至叔末凡有冤不能自伸者則質諸神而呴詛焉凶禍之報其應如響吁亦異矣余昔以貧故嘗效穆伯長所為亦為鄉貪脅取錢一萬二千余素懦既性不喜訟且不暇呴詛又不能效昔人之報怨今觀柳勝之事適與余

相類意者包藏禍心害人利己其必有冥報乎世之居鄉而不能如周處之去害居官而不能如吳隱之之酌泉敢於嗜利無耻者其亦知所警哉

冥數有報論

李德裕

宣尼罕言性命不語怪神非論無也欲人嚴三綱之道奉五常之教修天爵以致人爵不欲言富貴出於天命福祿由於冥數昔衛卜叶於沙丘為謚已久秦塞屬於臨洮名子不寢朝歌未滅而周流丹烏矣白帝尚在而

漢斷素蛇矣皆兆發於先而符應於後不可以智測也  
周孔與天地合德與鬼神合契將來之數無所遁情而  
狼跋於周鳳衰於楚豈親戚之義不可去也人倫之教  
不可廢也條侯之貴鄧通之富死於兵革可也死於女  
室可也唯不宜以餒終此又不可以理得也而命偶時  
來盜有名器者謂禍福出於胸懷榮枯生於口吻沛然  
而安溘然而笑曾不知黃雀遊於茂林而挾彈者在其  
後也余乙丑歲自荆楚保釐東周路出方城聞有隱者

困於泥塗不知其所如也徃謂方城長曰居守後二年南行萬里則知憾余者必因天譴譖余者必自鬼謀雖抱至寃不以為恨也余嘗三遇異人非卜祝之流皆遁世者也初掌記北門有管涔山隱者詣余曰君明年當在人君左右為文翰之職然須值少主余聞之愕眙洒然變色隱者亦悔失言避席求去余徐問曰何為而事少主對曰君與少主已有累世緣業是以言之余其年秋登朝至明年正月穆素纘緒不入禁苑及戶丞御史

有閩中隱者叩門請見余因下榻與語曰時事非久公  
不早去冬必作相禍將至若亟請居外代公者受患後  
十年終當作相自西南而入是秋出鎮吳門歲經八稔  
尋又仗鉞南燕秋暮有邑子王生引鄴郡道士纔升賓  
階未及命席謂余曰公當為西南節制益冬聖舒前符  
節至矣三者皆與言叶不差歲月自憲闡竟十年居相  
由西蜀而入代余執憲俄亦竄逐唯再謫南服未嘗有  
前知者為余言之豈禍患不可移者神道所秘莫得預

聞自古衡冤殺世者多矣冥報之事或有或無遂使好亂樂禍者以神道為茫昧余嘗論之仁人上哲必達生知命如顏氏之子犯而不校釋門達摩了空喻幻必不思報矣其下柔弱無心者力不能報所能報者乃中人耳悍強任氣如伯有灌夫之流亦在其臨歿之際方寸不撓魂魄不散唯結念於此是以能報夫人之捨生也如薪盡火滅溘然則無能為矣達於理者使心不亂則精爽常存不生不滅自可以超然出世升躋神明其次

精多魄強則能為厲冥報之事或有或無理在此也



古今事文類聚別集卷三十二